

Pendahuluan

1.1 Tujuan dan bidang kajian

Kajian ini adalah untuk melihat bagaimana Methodism telah berkembang masuk ke Malaysia. Kemudian, kemasukan Methodism ke kawasan Sitiawan iaitu tempat kajian yang dipilih oleh pengkaji akan dibincangkan.

Struktur organisasi gereja Methodist di peringkat kebangsaan juga akan diperbincangkan. Setelah itu, struktur organisasi dan perjalanan gereja Methodist di peringkat tempatan akan diperlihatkan. Di sini tumpuan adalah pada kegiatan-kegiatan gereja Sitiawan Wesley Methodist untuk memperlihatkan kegiatannya sebagai sebuah institusi agama.

Bahagian akhir kajian akan menyetuh tentang Pengerakan Karismatik (Charismatic Movement) yang telah bertapak di Malaysia dan menarik perhatian ramai penganut Kristian, termasuk penganut mahzab Methodism. Perbincangan akan dibuat daripada perspektif pertubuhan Methodist serta pandangan ahli gereja Wesley Sitiawan.

1.2 Tempat Kajian

Pengkaji telah memilih tempat asal pengkaji iaitu Sitiawan sebagai tempat kajian. Pengkaji telah bersama

gereja ini sejak dari kecil sehingga sekarang. Memandangkan tidak pernah ada kajian lepas dijalankan ke atas gereja ini, maka pengkaji mengambil kesempatan untuk menjalankan satu kajian kes di gereja Wesley Sitiawan ini.

Pengkaji telah mengenali para penganut gereja ini serta telah mengikuti segala aktivitinya dari masa pengkaji masih seorang budak lagi. Maka tidaklah menjadi masalah yang besar untuk pengkaji mengumpul maklumat mengenai gereja ini.

Secara sepintas lalu, kawasan Sitiawan terletak dalam daerah Manjung di Negeri Perak. Ia merupakan pintu masuk yang ulung ke destinasi pelancongan yang terkenal iaitu Pulau Pangkor.

1.3 Kerja Lapangan

1.3.1 Tempoh Penyelidikan

Pengkaji telah memulakan kerja-kerja luar daripada bulan April hingga Jun. Untuk mendapatkan bahan serta maklumat tentang kemasukan Methodism ke Malaysia dan Sitiawan, pengkaji telah pergi ke Arkib Methodist di Singapura pada bulan April.

Selepas Singapura, pengkaji telah memulakan kerja lapangan di Sitiawan. Pengkaji juga sering berulang-alik ke Seminari Teologi Malaysia yang berpusat di Petaling Jaya, Selangor serta ke Lembaga Pendidikan Methodist Malaysia

untuk mendapatkan bahan-bahan rujukan tambahan.

1.3.2 Metode Kajian

Pengkaji telah menggunakan beberapa kaedah kajian seperti pemerhatian serta ikutserta, temuramah dengan informan utama, temubual biasa, pemeriksaan ke atas data-data sekunder yang ada serta pengambilan gambar.

1.3.3 Pemerhatian serta ikutserta

Metode ini telah dapat pengkaji gunakan sebab pengkaji telah merupakan seorang ahli gereja ini sejak masih belasan umur lagi. Pengkaji memang telah giat mengikuti segala aktiviti gereja dan faham benar tentang kegiatan tersebut.

Pengkaji telah berkenalan rapat dengan ahli-ahli gereja ini lalu tidak menimbulkan sebarang syak wasangka terhadap pengkaji. Ini telah mempermudah lagi kerja lapangan pengkaji.

Malah pengkaji telah menerima galakan daripada anggota-anggota gereja ini sewaktu menjalankan kajian lapangan ini. Segala maklumat telah dapat diperolehi tanpa sebarang kesangsian tentang kebenaran maklumat tersebut.

1.3.4 Temuramah dengan Informan Utama

Informan utama dalam kajian ini adalah paderi yang

sedang berkhidmat sekarang di gereja Wesley Sitiawan serta juga paderi-paderi yang pernah berkhidmat di gereja ini yang masih dapat dihubungi. Anggota-anggota gereja ini yang sudah berusia dan telah lama bersama perkembangan gereja ini juga dikenal pasti sebagai informan utama. Begitu juga dengan setiausaha gereja yang telah lama berkhidmat dengan gereja ini.

Maklumat tentang perkembangan semasa gereja dan struktur organisasi perjalanan struktur institusi Methodist juga telah diperolehi daripada paderi-paderi yang tersebut di atas. Latar belakang serta perkembangan gereja ini telah diperolehi daripada anggota-anggota gereja yang sudah berusia.

1.3.5 Temuramah Biasa

Pengkaji berbual-bual dengan ahli-ahli gereja tentang isu yang menjadi tumpuan pengkaji. Ia dijalankan seakan-akan semasa berbual kosong dan pengkaji akan cuba mengingati sebanyak mana yang boleh dan kemudian akan dicatitkan dalam sebuah buku log kosong yang telah disediakan.

1.3.6 Kajian dokumen dan perpustakaan

Pengkaji telah memperolehi beberapa kajian dari Jabatan Tionghua serta juga dari Jabatan Pengajian Asia

Tenggara, Universiti Malaya dan tempat-tempat lain mengenai penghijrahan kumpulan Kristian Foochow yang membawa masuk agama Kristian Mahzab Methodism ke Sitiawan.

Pembacaan mengenai sejarah kemasukan Methodism telah juga didapati daripada buku-buku yang tercetak, buku-buku latihan ilmiah serta juga laporan-laporan dalam journal-journal dan dalam artikel-artikel yang tertulis.

1.4 Masalah-masalah semasa menjalankan kajian

Masalah utama yang dihadapi oleh pengkaji ialah untuk mengesan kembali sejarah perkembangan gereja Wesley Methodist Sitiawan . Ini adalah kerana tiada catatan-catatan tentangnya. Pengkaji terpaksa melalui halaman demi halaman dalam journal atau buku tahunan mesyuarat organisasi Methodist atau pun TRAC Annual Journal.

Buku-buku tahunan ini adanya yang telah hilang serta banyak yang berada dalam keadaan yang tidak sesuai untuk dibaca. Pengkaji terpaksa menghubungi beberapa tempat yang berkemungkinan mempunyai salinan tersebut tetapi tidak berjaya. Lalu pengkaji telah terpaksa melawat Arkib Methodist , Singapura untuk memperolehi journal-journal tersebut sekali lagi pada bulan Ogos.

Journal-journal yang lama ini juga telah didapati senang terkoyak dan pengkaji terpaksa berhati-hati mengendalinya semasa mencari bahan dan ini telah memaksa

pengkaji mengambil banyak masa. Kadang-kala ada juga halaman yang dikehendaki telah terkoyak atau telah hilang.

